

XI თავი

სტუდენტის სტატუსის შეჩერება

ბსუ-ს სტუდენტის სტატუსის შეჩერების რეგულაცია განისაზღვრება ბსუ-ს წესდების 66-ე მუხლით, შესაბამისი აკადემიური უმაღლესი განათლების საფეხურის სასწავლო პროცესის მარეგულირებელი წესებით (ბაკალავრიატისა და მაგისტრატურის საფეხურისთვის - „სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის N111 დადგენილებით და დოქტორანტურის საფეხურისათვის „ბსუ-ს დოქტორანტურის დებულების დამტკიცების შესახებ“ ბსუ-ს აკადემიური საბჭოს 2017 წლის 5 აპრილის №19 დადგენილებით (წინამდებარე გზამკვლევის **დანართი 20**) და „ბსუ-ს სტუდენტთა სწავლის საფასურის გადახდის წესის დამტკიცების თაობაზე“ ბსუ-ს წარმომადგენლობითი საბჭოს 2015 წლის 29 სექტემბრის N06 გადაწყვეტილებით (წინამდებარე გზამკვლევის **დანართი 3**).

ბსუ-ს სტუდენტის სტატუსის შეჩერების საფუძველია:

- ა) ადმინისტრაციული (სწავლის საფასურის გადახდა) ან/და აკადემიური რეგისტრაციის (სასწავლო პროცესის ელექტრონული მართვის სისტემაში რეგისტრაციის) გაუვლულობა;
- ბ) პირადი განცხადება (მიზეზის მითითების გარეშე);
- გ) ორსულობა, მშობიარობა, ბავშვის მოვლა ან ჯანმრთელობის მდგომარეობის გაუარესება;
- დ) უცხო ქვეყანაში, უმაღლეს საგანმანათლებლო დაწესებულებაში სწავლა (გარდა გაცვლითი საგანმანათლებლო პროგრამის ფარგლებში სწავლისა).

„ბ“-„დ“ ქვეპუნქტებით გათვალისწინებული რომელიმე საფუძველით უნივერსიტეტის სტუდენტის სტატუსის შეჩერების მოთხოვნით სტუდენტმა განცხადებით უნდა მიმართოს რექტორს სასწავლო პროცესის დაწყებიდან არა უგვიანეს 15 დღისა. ხანგრძლივი და მძიმე ავადმყოფობის ან სხვა შემთხვევაში, როცა დოკუმენტურად დასტურდება სტუდენტის სასწავლო პროცესში მონაწილეობის შეუძლებლობა, გამონაკლისი შესაძლოა დაიშვას დეკანის წარდგინებით მომზადებული რექტორის ბრძანებით.

სტუდენტს, მისი განცხადების (მიზეზის მითითების გარეშე) საფუძველზე, ბსუ-ს სტუდენტის სტატუსი შეიძლება შეუჩერდეს არანაკლებ 1 წლის ვადით (სტატუსის შეჩერების შესაბამისი სემესტრის - გაზაფხულის ან შემოდგომის - დაწყებამდე), იმის გათვალისწინებით, რომ სტატუსის შეჩერებიდან 5 წლის გასვლის შემდეგ, პირს უწყდება სტუდენტის სტატუსი. დამატებითი სემესტრის/წლის ბსუ-ს სტუდენტი ვერ სარგებლობს პირადი განცხადების საფუძველზე სტუდენტის სტატუსის შეჩერების უფლებით.

სასწავლო პროცესში დაბრუნების (სტუდენტის სტატუსის შეჩერების შესახებ რექტორის ბრძანების ძალადაკარგულად ცნობის/სტუდენტის სტატუსის გააქტიურების) შესახებ ბრძანება ასევე გამოიცემა არაუგვიანეს 15 დღისა სასწავლო პროცესის დაწყებიდან (გამონაკლისი შესაძლოა დაიშვას რექტორის ბრძანებით, მაგრამ არაუგვიანეს 21 დღისა სასწავლო პროცესის დაწყებიდან, სტუდენტის განცხადებისა და დეკანის დასაბუთებული წარდგინების საფუძველზე). სტატუსშეჩერებული სტუდენტის (გარდა ფინანსური დავალიანების გამო სტატუსშეჩერებულისა) სასწავლო პროცესში დაბრუნება დასაშვებია შესაბამისი სემესტრიდან

(გაზაფხულის ან შემოდგომის სემესტრი, როცა პირს შეუჩერდა სტუდენტის სტატუსი), სხვა შემთხვევაში სტუდენტი ვალდებულია სასწავლო პროცესში დაბრუნების მიზნით მონაწილეობა მიიღოს ბსუ-ს შიდა მობილობის პროცესში.

ადმინისტრაციული (ფინანსური დავალიანების) ან აკადემიური რეგისტრაციის გაუვლელობის გამო, ასევე სხვა საფუძვლით სტატუსშეჩერებული პირი, რომელსაც სურვილი აქვს სასწავლო პროცესში დაბრუნდეს განსხვავებულ სემესტრში (და არა იმ სემესტრში, რომელშიც შეუჩერდა სტატუსი), ვალდებულია ბსუ-ს სასწავლო პროცესში დაბრუნების მიზნით მონაწილეობა მიიღოს ბსუს შიდა მობილობაში.

სტატუსშეჩერებული ბსუ-ს სტუდენტის შიდა მობილობის გარეშე სასწავლო პროცესში დაბრუნების შემთხვევაში შესაბამისი ფაკულტეტის კრედიტების აღიარების კომისიამ უნდა უზრუნველყოს ამ სტუდენტის მიერ სასწავლო პროცესში დაბრუნებამდე გავლილი სასწავლო კურსების მიმდინარე საგანმანათლებლო პროგრამასთან თავსებადობის (კრედიტების აღიარების) დასკვნის შედგენა და სტუდენტისათვის სწავლის სემესტრის განსაზღვრა (ასეთი საჭიროების შემთხვევაში).

შესაბამის სემესტრში აკადემიური რეგისტრაციის ვადის ამოწურვის შემდეგ, სასწავლო პროცესის მართვის ელექტრონული სისტემისა და დეკანის ოფისიდან მოწოდებული ინფორმაციის საფუძველზე, გამოიცემა რექტორის ბრძანება აკადემიური რეგისტრაციის გაუვლელობის გამო ბსუ-ს სტუდენტის სტატუსის შეჩერების შესახებ, რომელიც განთავსდება უნივერსიტეტის ოფიციალურ ვებგვერდზე, სტუდენტთათვის საჯარო გამოცხადების მიზნით. აღნიშნული ბრძანების საფუძველზე სტუდენტს არ დაერიცხება შესაბამისი სემესტრის სწავლის საფასური.

შესაბამის სემესტრში (შესაბამის ეტაპზე) ადმინისტრაციული რეგისტრაციის გაუვლელობის - სწავლის საფასურის გადაუხდელობის გამო ბსუ-ს სტუდენტის სტატუსის შეჩერების შესახებ რექტორის ბრძანება გამოიცემა უნივერსიტეტის რექტორის ბრძანებით ამ სასწავლო წელს განსაზღვრული ადმინისტრაციული რეგისტრაციის ვადებისა და უნივერსიტეტში მოქმედი სწავლის საფასურის გადახდის წესის მიხედვით.

დამატებითი სასწავლო წლის/სემესტრის სტუდენტს ბსუ-ს სტუდენტის სტატუსი არ უჩერდება და გამოიცემა ბრძანება ამ პირისათვის ბსუ-ს სტუდენტის სტატუსის შეწყვეტის შესახებ.